



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

**15. Kalenderwoche – ab 11. April 2010**

## Juchendweihe

Mansche Sachn dud mor eenfach nie vorgessn - zum Beischbiel de Juchendweihe! Das hädde isch damals, wo die gewähns is, vor dausend Jahrn... odor isses noch längor hähr?

Nee, Schbaß beiseide... abor es is ja werglisch schon so lange hähr, dass mor juchendgeweiht wordn is - un es is drozdähm noch alles vorm geisdischn Ooche, als wie wenns erschd gesdorn war! Das dud ooch meinor Gudstn so gehn! Die weeiß sogahr noch ganz genau, wasse fiehr Unnorwäsche angehabbd had. Das war so schon welsche, die e bißl säxi war. Mid Beha! Obwohl, sachd meine Gudste, dähr Beha nisch unbedingt nodwendisch gewähns is. Rein von dor Fungdsjohn hähr! Abor ähm fiehr dähn Ibordridd zu de Erwachsenen... - da dad ehm bei de Mädels e Beha dazugeheern! Bei uns Jungs wars eene Zigredde!

Nee, de Mädels ham dazumals nisch geroochd. Mädels sinn dazumals zu meinor Zeid noch irschendwie werglisch e bißl wenischor Raudis gewähns als wie mir Jungs. Heidzudaache dun sisch Jungs un Mädels, was das Raudiduhm bedreffn dud - also Roochn, Saufn un was sonsd noch so is - ...nee, daderbei dun die sisch nisch mähr groß unnorscheidn. Ooch beim Kohmasaufn nisch!

Wobei, wo mir Juchendweihe haddn, da ham fasd alle ganz offizjell zum Alkehohl greifn derfn. Isch durfde sogahr alln annorn einschenkn... also dor Onkl Egon war da gewähns, de Dande Hilde, dor Onkl Wernor, de Dande Marion... de zwee Obas, de Oma... da haddsch bloß noch eene...

ooch e baar Leide warn da, zu die isch zwahr ooch Onkl un Dande gesachd hab, die abor in Werglichkeed bloß irsche ndwelsche Bekande von meine Eldorn warn... jednfalls - isch hadde beim Einschenkn ganz scheen zu dun. Un so nähmbei habsch mir ehm ooch selbor was mid eingeschenkd... so frieh wie an dähm Ahmd von dor Juchendweihe, war isch lange vorhähr nisch mähr ins Bedde gegang. Abor was heeßd gegang... geschlischn! Un schleschd wars mir! Isch weeß noch, dass isch gahr keene Lusd mähr hadde off Erwachsenwern!

Abor sonsd... die Feiorstunde... un wo mir dann off de Biehne mussdn... alle scheen rausgebudzd... isch hadde een neun grien Anzuch an... isch bin mir wie e Frosch vorgekomm - e Frosch mid Schlibs! Dähm Anzuch habsch hinnorhähr nie widdor angezochn. Abor das is alles noch, wie als wennis gesdorn gewähsn is! Undn saßn dann alle Erwachsenen... mir ohm off dor Biehne...!

Un dann hadd mor das ja sogahr schon vorhähr geiebd... also, wie mor off de Biehne gehn dun... wie mor uns offschdelln missn... un wie mor de Blum grischn un das Buch... Weldall. Ährde, Mänsch... - das hab isch heide noch! Ja, das hadn mir vorhähr geiebd in dähm großn Saal... abor wos dann soweid war... nee, is das eene Offreeschung gewähsn! Un isch hab misch in meim bleedn grien Anzuch geschämd! Un de Schuhe ham gedriggd! Un dähr Schlibs wollde eenfach nisch grade häng! Un eene Hidze is in dähm Saal gewähsn... - nee, da mussde als Juchenweihling ehm dursch! Das du abhärdrn fiehrs ganz Lähm!

**Eduard Sachsenmeyer**